

2016-imut Aningaasanut Inatsisissamut Siunnersuut

(Aningaasaqarnermut, Aatsitassanut Nunanullu Allanut Naalackersuisoq)

Akissuteqaat

(Aningaasaqarnermut, Aatsitassanut Nunanullu Allanut Naalackersuisoq)

Aappassaaneerneqarnera**Aallaqqaasiut**

Aallarniutigalugu Aningaasaqarnermut Akileraartarnermullu Ataatsimiititaliap 2016-imut aningaasanut inatsisissatut siunnersuummik, Naalackersuisullu allannguutissatut siunnersuutaasa matumani aappassaaneerneqarnissaanni peqqissaartumik sulisimaneranut Naalackersuisut sinnerlugit qujanarpunga.

2016-imut aningaasanut inatsisissatut siunnersuutip uuma aappassaaneerneqarnissaa 3. november pisussaagaluarpog, pingajussaaneernissaalu 13. november pisussaagaluarluni. Inatsisartulli Siulittaasoqarfiata aappassaaneerinninnissaq 11. november pingajussaaneerinninnissarlu 20. november pisussanngorlugit kinguartissimavai.

Massakkut aappassaaneerneqarnissaanut missingersuutitut ilanngussassanut tunngatillugu Naalackersuisut 48-inik allannguutissatut siunnersuuteqarput oqaasertaliussanullu tunngatillugu 15-inik allannguutissanik siunnersuuteqarput.

Isertitassatut aningaasaliissutitut allannguutissatut siunnersuutit 11-t saqqummiunneqarput. Allannguutissatut siunnersuutit aqutigalugit ukiuni aningaasanut inatsiseqarfiusuni 2016-2019 IST-inerteri missingersuutigineqarsimasut ukiumut agguaqatigiissillugu 40 mio. kr. sinnerlugit pitsanngoriartinneqassapput. IST-inernissai missingersuutigineqarsimasut taamaasiornikkut annertuumik pitsanngoriartinneqassapput tamannalu pissaq raajartassiissutit 66.500 tonsinit 83.000 tonsinut biologit siunnersuinerat malillugu 2016-imi qaffanneqarnerisigut. Tamanna pissaartaaq Pituffik pillugu kiffartuussinissamik isumaqatigiissutit massakkut kiffartuussinissamik isumaatigiissuteqarfigineqarsimasumik qaammatinik arfinilinnik sivitsuiffigineratigut. Paarlattuanik konto pingaarnermi 24.11.26 Avaleraasartuunut Akitsuutini isertitassatut missingersuutit ukiumut 81 mio. kr.-init 40 mio. kr.-inut appartinneqarput.

Isertitassatut missingersuutit pitsanngoriarnerisa kingunerisaanik partiit naalackersuisuutitaqartut aningaasanut inatsisissatut siunnersuutip isumaqatiginninniutigineqarnerani isumaqatigiissuteqarput konto pingaarneq 24.13.50 Akileraartarnermi akitsuusiisarnermilu isertitaqarnerulernissamut sillimmatini isertitassatut sillimmatit ukiumut 42 mio. kr.-inik appartinniarneqassasut. Taamaasilluni isertitassatut sillimmatit sinneruttut ukiumut 54,5 mio. kr.-iulerput taakkulu pingajussaaneerinninnissamut atugassanngortinniarneqassapput.

Kontomi pingaarnermi nutaami 34.11.08 Atornerluisunik katsorsaasarnissamut pilersaarummi siunissami nunarput tamakkerlugu katsorsaasarnissanut aningaasanik immikkoortitsisoqarnissaa qinnutigineqarpoq. Atornerluisunut katsorsaasarnermut pilersaarut Namminersorlutik Oqartussani susassaarfiit akimorlugit, kommuninullu tunngatillugu suliniutinik ataqatigiissunik imaqarpoq. Atornerluisuuneq atornerluisunut ataasiakkaanut piinnarnani, inuiaqatigiinnulli tamanut aningaasartuutaasorujussuuvoq. Naalackersuisut atornerluisunut pilersaarutaanni atornerluisuunermut katsorsaariaaseq allangorarnersooq, najukkanullu pituttorsimanersooq aningaasanik immikkoortitsiffigineqarpoq.

Kontomi pingaarnermi 89.71.40 Nukissiorfiit, sanaartornermut taarsigassarsiarititani Qorlortorsuarimi erngup nukinga atorlugu innaallagissiorfiup 2016-imi aamma 2017-imi allilernissaanut 144 mio. kr.-inik immikkoortitsisoqarpoq. Allilerinikkut erngup nukinga atorlugu innaallagissiorfiup innaallagiak pilersittagaa marloriaatinngortinneqassaaq.

Aningaasaqarnermut Akileraartarnermullu Ataatsimiititaliap aappassaaneerinnittoqarnissaanut isumaliutissiisutaa.

Aappassaaneerinninnissamut isumaliutissiisummi Aningaasaqarnermut Akileraartarnermullu Ataatsimiititaliap allannguutissatut siunnersuutit Naalackersuisunut akuerisassanngortinneqarsimasut tamaasa, oqaasertaliussanut tunngatillugu allannguutissatut siunnersuutit marluk minillugit, tullinnguuttuni nassuiaateqarfigineqarnissaat inassutigaa.

Aningaasaqarnermut Akileraartarnermullu Ataatsimiititaliap allannguutissatut siunnersuutip nr. 50-ip itigartitsissutigineqarnissaa inassutigaa, ilutigisaanillu ataatsimiititaliaq allannguutissatut siunnersuut nr. 65 aqutugalugu nammineerluni allannguutissatut siunnersuuteqarluni. Tamatuma kingunerisaanik Pinngortitami imaluunniit ajunaarnersuarni inunnik ikiuiniarnermut atatillugu nunat tamalaat akornani ikiuiniaraqatigiiffinnut tapiissutitut koruunit millionit affaasa atugassanngortinnissaannut Naalackersuisut piginnaatinneqassapput. Allannguutissatulli nr. 65-imik siunnersuuteqarnikkut aningaasaliissutinik atugassanngortitsinissaq Aningaasar-nermut Akileraartarnermullu Ataatsimiititaliap akuersissuteqaqqaarneratigut pisussanngortin-neqarpoq, allannguutissatut siunnersuut nr. 50 malillugu aningaasaliissutinik atugassanngor-titsineq Naalackersuisut akuersissuteqarnerisigut tamatumalu kingorna Ataatsimiititaliamut ilisimatitsussuteqarnikkut pisussanngortinneqarsimagaluarluni. Aningaasaqarnermut Akileraartarnermullu Ataatsimiititaliap inassuteqaataa Naalackersuisunit tusaatissatut tiguneqarpoq.

Allannguutissatut siunnersuutip nr. 56-ip itigartitsissutigineqarnissaa Aningaasaqarnermut Akileraartarnermullu Ataatsimiititaliap inassutigaa. Taamaasiornikkut konto pingaarnermi nutaami 64.10.27 Inuussutissarsiutit ineriartortinnerinut pilerisaarinernullu suliniutini erseqqisaafigineqarsimannigitsunik aningaasartuutaanersunik assinganik isertitsissutaasinnaasunik siunnersuuteqaqqaarani aningaasartuuteqarsinnaanissaq periarfissaruppoq. Tamanna Naalackersuisut tusaatissatut tiguaat kontomut pingaarnermullu tunngatillugu aningaasaliisarnissanut tunngavissat allanngortissinnaajumallugit pingajussaaneerinninnissamut allannguutissanik siunnersuuteqassallutik.

Tamatuma saniatigut Aningaasaqarnermut Akileraartarnermullu Ataatsimiititaliaq isumaliutissiissummi Naalakkersuisunut arlalinnik apeqquteqarpoq, tamakkulu tullinnguuttuni aki-neqassapput.

Aningaasaqarnermut Akileraartarnermullu Ataatsimiititaliap kissaatigaa 2016-imi raajartassiissutissat qaqugu Naalakkersuisunit aalajangiiffigineqavinniarnersut pillugit paasitineqarnissani. Naalakkersuisut ilisimatitsissutigisinnaavaat tamassuma aningaasanut inatsisissatut siunnersuutip uuma aappassaaneerineqarnerata kinguninngua 2016-imut pisassat aaliangersorneqarnerisa tusarniutigineqareernerisa kingornatigut pisinnaanissaa naatsorsuutigineqarmat.

2016-imut aningaasanut inatsisissatut siunnersuummi Visit Greenlandip ataani suliniutip "Sanaluttarnerup aamma misigisassarsiortitsinissamik suliniutit ineriartortinneri"-nut aningaa-sanik imikkoortitsisoqarsimangilaq. Aningaasaqarnermut Akileraartarnermullu Ataatsimiititaliap kissaatigaa suliniutip Visit Greenlandip ataanni ingerlatiinnarneqarnissaa, taamaattumillu kaammattuutugalugu konto pingaarneq 64.10.17 Nunami inuussutissarsiutinut takornariartitsinermullu tapiissutit pillugit Naalakkersuisut allannguutissamik siunnersuuteqassasut. Naalakkersuisut tamanna tusaatissatut tiguaat tamannalu pillugu pingajussaaneerinninnissamut allannguutissatut siunnersuummik saqqummiussaqaassallutik.

Pingajussaaneerinninnissamut allannguutissatut siunnersuutigisassatut ilimagineqartut

Aningaasanut inatsisissap ukiut siuliini suliarineqartarnerini ileqquusimavoq aappassaaneerinninnissamut allannguutissatut siunnersuutit pingajussaaneerinninnissamut allannguutissatut siunnersuutigineqartunit amerlanerungaatsiartarnerat.

2016-imullu aningaasanut inatsisissatut siunnersuummut tunngatillugu pissutsit allaassapput. Siullermik aappassaaneerinninnissamut allannguutissatut siunnersuutit ukiut siuliini aningaasanut inatsimmik suliaqartarnermut sanilliullugit ikinnerupput, ilutigisaanillu partiit naalakkersuisuutitaqartut kontomut pingaarnermut 24.13.50-imut Akileraartarnermi akitsuusiisarnermilu isertitaqarnerulernissamut sillimmatit sinneri pillugit ukiumut 54,5 mio. kr.-it atugasanngortinneqartarnissaat pillugit isumaqatigiissuteqarsimallutik. Tamatuma kingunerisaanik akitsuutinut tunngatillugu aningaasat ikinnerungaatsiartut atugassanngortinneqartalissapput, kiisalu ingerlatsinermut tapiissutitullu aningaasaliissutini ukiumut 20 mio. kr.-inik ileqqaaruteqartarnissaq ingerlanneqartariaqassalluni. Ileqqaarutissat aningaasanut inatsimmi kontonit pingaarnermit assigiinngitsunit pissarsiariniarsarineqassapput, tamatuma kingunerissallugu annertuumik allannguutissatut siunnersuusiortariaqarnissaq.

Tamatuma saniatigut ineqarnermut tapiissutit aamma utoqqalinersiutinut siusinaartumillu pensionisiat pillugit inatsisartut inatsisissaat, kiisalu aalisakkat ikerinnarsiortut ammassassuit ammassaallu akitsuusertalernissaat ilanngullugit suliarineqassapput.

Naggasiineq

Tamanna nangillugu 2016-imut aningaasanut inatsisissatut siunnersuut pillugu naalakkersuinikkut isumaqatigiinniarnernut atatillugu ajunngitsumik angusaqarfiusumillu sulisoqarsimanageranut partiit tamaasa Naalakkersuisut sinnerlugit qujaffiginiarpakka. 2016-imut aningaa-

sanut inatsisissaq pillugu isumaqatigiissutissap ulluni qaninnerni saqqummiunneqarsinnaanissaa Naalakkersuisuniit neriuutigineqarpoq.

Taamatut oqaaseqarlunga inersuarmi maani aningaasanut inatsisissaq pillugu ajunngitsumik angusaqarfiusumillu oqallittoqarnissaa qilanaaraara.